

國朝書獻類徵初編卷二十一目錄

宰輔二十一

尹繼善

劉統勳

國朝書牘彙編卷二十一

國朝耆獻類徵初編卷二十一

通奉大夫前署江西巡撫江西布政使司布政使湘陰李桓輯

宰輔二十一

尹繼善

尹繼善滿洲鑲黃旗人大學士尹泰子雍正元年進士改庶吉士散館授編修充日講起居注官五年三月遷侍講尋署戶部郎中九月命往廣東察審布政使官達按察使方願瑛受賄徇庇案得實卽署按察使六年四月授內閣侍讀學士協理江南河務八月署江蘇巡撫七年二月實授尋署河道總督十二月疏禁收漕上司陋規及官吏浮費每石定爲加費六分半給旗丁半給州縣

常平社倉捐穀聽民樂輸不得隨漕勒徵 詔如議行八年奏言
崇明屹峙重洋爲江南屏障知縣不足彈壓請增設巡道駐之兼
轄太倉通州至縣屬沙地遼闊鎮標四營駐城內巡察難周應撥
左營駐永興沙地增巡檢一駐牛羊沙移縣城巡檢駐大安沙並
撥左營千把總二協同分防其戲臺等沙各設哨船巡緝福山營
爲江防門戶應撥蘇鎮沙船四隸之與京口狼山等汛按期會哨
又江蘇按察使駐江甯距巡撫治所遠請移駐蘇州蘇松道責在
巡防應移駐上海下部議行九年署兩江總督奏請析淮安府屬
之山陽縣爲二增知縣縣丞典史各一治廟灣鎮移廟灣司巡檢
駐草偃口鹽城清溝司巡檢駐上岡撥鹽城縣訓導歸新縣析揚

州府屬之江都縣爲二增知縣典史各一撥主簿訓導及邵伯驛
官二巡司並邵伯驛歸新縣又如皋縣增設主簿一駐掘港場均
議行定山陽分縣曰阜甯江都分縣曰甘泉十年正月協辦江甯
將軍兼理兩淮鹽政疏言京口爲江淮鎖鑰南北咽喉向設沙船
五十六艍幫船三十二水兵千四百餘實水師重鎮乃隸將軍標
爲水陸路兩營陸路將弁不諳水師船隻水兵又遠駐距鎮江數
十里之高資港春秋兩操外將不知兵兵不知伍請於高資港設
水師都司千把總一歸江陰水師副將轄操暇教以技藝資防禦
江甯爲省會重地襟帶長江居京口狼山上游駐防兵與學習水
師向撥將軍標沙船二十水兵三百餘春秋操演但操期止選鎮

江千把總四員至江甯分配教習事竣仍回本任無論暫時派撥並無責成難收實效其實鎮江將弁初不能教習水師至今三百餘兵技藝未習且家在鎮江僕僕往來經理旗員素不熟識請撥隙地建營房令挈眷駐紮設水師守備一把總二專司其事歸將軍轄狼山爲長江尾閭大海門戶鎮標三營向設戰船二十二春秋出洋操練江防每月會哨近年來僅駕船數隻兵數名往來江口並不出洋至會哨更屬空文尤可異者趕繒大船原爲出洋而設近竟高擱沙灘臣飭交署總兵王廷梅整理期復舊觀再京口江甯派佐領協領二員每月巡查江南狼山鎮標右營將弁巡查海汛中左二營亦輪派游巡如此庶長江數千里聲援聯絡奏入

上嘉之先是尹繼善疏請清查江蘇積欠錢糧 命侍郎彭維新等會同辦理二月合奏言自康熙五十一年至雍正四年官侵吏蝕四百七十二萬餘民欠五百三十九萬餘疏入 詔侵蝕自首者免罪尹繼善等下部議敘九月奏請改直隸徐州爲府設知府一附郭增置一縣設知縣一改直隸邳州爲屬州並所屬之睢甯宿遷二縣歸徐州府轄改分駐徐州之淮安府同知爲徐州府同知增設通判經歷各一改州同爲縣丞吏目爲典史南北岸州判爲主簿學正爲府教授訓導管縣學巡檢驛丞閘官歸縣轄又請分壽州置一縣設知縣典史各一改壽州訓導管縣學又增設定遠縣池河驛巡檢一均議行定徐州附郭縣曰銅山壽州分縣

日鳳臺十二月條奏鹽政巡緝事宜請於儀徵縣之青山頭增一營設守備把總各一兵百巡船四江都縣之馬家橋甘泉縣之邵伯鎮北壩僧道橋各設把總一兵三十揚州府搜鹽廳委佐雜一員同武弁監察新設之三江營同知改爲鹽務道准所選府佐監掣淮南之泰壩淮北之場關大伊關永豐壩烏沙河湖口及泗州天長壩俱揀員管理淮北壩所場關事歸淮揚道轄督緝事歸淮揚淮徐二道分轄部議 從之十二年正月調雲貴廣西總督先是雲南思茅土把總刁興國等滋事前督高其倬擒興國餘黨尙未解六月尹繼善奏言元江臨安賊勢猖獗臣調鶴麗鎮總兵楊國華領兵往元江與臨元鎮總兵董芳協勦賊潰匿暗縱我軍遣謀入

賊寨舉火奮勇衝入斬賊酋三從賊百餘生擒六十九十一月又奏言元臨之內地平定而攸樂思茅餘孽未靖臣調兵勦捕念地方遼闊兵到勢必奔竄酌出東西兩路東路兵分三支一由紅藤箐黨戛黨別出慢岔河底一由思茅糯電那列漫蚌等處至茄色裸所及磨胖三達一由孔明山莽通莽瓦及小猛崙等處分布堵勦事竣會合攸樂清理三十六寨西路兵分二支一由關鋪板角一帶一由白馬山圈羅一帶搜勦事竣會勦六固再分遣土練沿江堵禦以防奔軼令投誠賊酋刁輔國等隨軍效力今已攻破賊柵十五寨招降夷民八十餘寨其遁匿餘黨分路圍剿務在廓清臣惟攸思一帶非元臨內地可比非兵不足示威恃兵又無善後

所期恩威並濟操縱得宜庶邊圉永甯疏入 諭曰勦撫名雖二
事恩威用豈兩端當撫者不妨明示優容當勦者亦宜顯施斬馘
俾其知順則利而逆則害方可期近者說而遠者來今此目前攻
心之師卽寓將來善後之舉是乃仁術非關詐謀甯止綏靖普思
將見信孚莽緬也識之十二年三月奏貴州新闢苗疆入事一台
拱舊營改建於歐家寨一升台拱營爲鎮移清江鎮總兵駐之置
中左右三營設遊擊守備各三千總六把總十二降清江鎮爲協
設副將統原設左右二營一移清江同知駐台拱增鎮遠府理苗
通判駐清江裁天柱縣縣丞增施秉縣主簿駐台拱一歐家寨河
可達下秉宜疏濬以通台拱糧運一台拱增兵擇各鎮協營精練

撥補一各寨荒田諭復業一清查九股苗寨界址擇舊苗目之良
善者按寨大小酌定鄉約保長甲長管束稽查一古州清江界之
朗洞地方分設塘汛令文武官弁巡行化諭部議 從之七月奏雲
南潯土黃河工竣起土黃經西隆西林土富州土田州過剝隘至
百色表七百四十餘里得 旨嘉獎十二月奏貴州台拱改鎮增
兵請令本標右營遊擊帶兵五百駐下秉撥把總一兵八十分防
施秉外委一兵二十分防新城原防施秉之黃施營兵改防黃平
州改黃施營爲黃平營仍隸台拱鎮撥黃平營外委一兵三十分
防巖門原防巖門之平越營兵撤回再撥鎮標守備把總各一兵
二百駐防稿貢汛 從之是月 詔廣西省仍歸廣東總督轄十三

年閏四月奏請於安籠鎮增兵三百定廣協增百四十思南營增設遊擊一兵百五十守備改爲中軍守備歸銅仁協轄石阡營增兵百遵義黔西二協各裁都司守備左營改爲中軍都司右營改爲守備畱遵義協右營千總一兵百駐防桐梓縣原防之把總撤回又請撤黔西協原防安平汛兵另撥千總一兵百二十駐沙土調安順營分防瀾陽汛千總一兵八十移駐安平瀾陽汛改歸長寨營調安順營分防石頭寨把總一兵五十移駐平遠協之白老虎汛石頭寨撥歸化營千總一兵五十防守又安順營之犂兒哨於提標城守後營內撥兵防守均議行七月奏貴州頑苗聚眾倡亂臣檄調雲南兵四千餘並湖廣廣西兵策應嗣雲南副將紀龍

勦破清平賊穴參將哈尙德收復新舊黃平二城與紀龍合兵至
重安渡江副將周儀參將崔傑都司陳思儀等收復餘慶縣獲賊
酋羅萬象等廣西總兵王無黨帥兵二千五百與古州總兵韓勦
搜勦八寨高州總兵譚行義帥兵四千九百協勦鎮遠一路臣又
委王無黨帥廣西兵八百並前調至之湖南兵三千至鎮遠總統
襄陽總兵焦林帥兵二千已起程大兵雲集分路會勦破逆巢數
十斬首千餘生擒賊酋阿九清等黃平餘慶平越見俱平定鎮遠
施秉偏橋都勻黎平俱無失疏入 命停派往駐常德之熱河保
定浙江湖廣兵乾隆元年設貴州總督以尹繼善爲雲南總督二
年閏九月奏豁雲南軍丁銀萬二千二百有奇 允之是月來京

國朝典章考卷二十一
陛見以父尹泰年老乞畱京 命爲刑部尙書兼管兵部事議
政處行走十二月充經筵講官三年丁父憂四年正月疏言臣兄
尹立善素不安分臣父尹泰奏請發黑龍江今五年洗心改過乞
恩赦回令於錦州看守臣祖父墳墓 許之五月晉太子少保
教習庶吉士七月充繙譯鄉試正考官八月充三禮綱目兩館副
總裁五年授川陝總督時松潘鎮總兵潘紹周以郭羅克番滋事
疏請剿之 敕與總督提督會商尹繼善檄諭番目擒獻夾孀番
眾畏服六年奏善後四事一分設土目擇上中郭羅克副土目給
外委土百戶委牌分管各寨再拔副土目數名協理一頒給打牲
號片按番寨大小酌給號片出口人給一紙無者擒治一寬從前

積案番人所劫牲畜年遠根究爲難夾壩旣經痛懲均免追問一
撤駐防兵前督查郎阿奏准每年撥兵二百駐防番地千餘里兵
力不足控制恐日久玩生應撤回以省遣戍 諭曰所辦甚妥仍
因時制宜爲之先是御史李愬奏參甘肅有司諱災不報 命愬
與尹繼善會勘得實尹繼善因請將巡撫元展成等分別治罪并
自請議處尋部議銷加一級七年丁母憂八年二月署兩江總督
協理河務 命馳驛赴任 賜以詩曰淮沛今何似災餘不忍言
邇來闕二黼誰與辦三殮敢靳司農帑還祈大造恩當春應舉趾
積潦尙畱痕民瘼遐觀在心憂夢想存勉伊經畫策爲我活黎元
五月疏言臣欽奉 恩命同任河防夙夜靡甯寢食幾廢緣以久

離江南情形各異詳勘博考體察民情咸以舊制宜循萬口如一
凡三事一毛城鋪宜仍舊也黃河至徐州北係山嘴南偏郡城以
千支萬派之水納之數十丈之中下流不暢則上游必壅前河臣
靳輔於上游南岸毛城鋪立減水壩下疏引河以洩盛漲北岸自
李道華家樓至蘇家山不設隄工聽其漫入微山湖由荆山口入
運少殺其洶涌之勢近則因毛城鋪進水過多圈隄築壩層層阻
閉致南岸日高黃溜側注北岸石林一帶處處受險經欽差大臣
議於壩口水底用亂石填高臣按此處洩水之路止有倒勾三河
其餘支港俱已淤平若再填高壩口水底是有遵照舊制之名仍
與舊制不同有隨時啟閉之名實與緊閉無異不惟北岸無隄處